

Date – 27/03/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Minister Pu Lalduhoman thalai thi tam lutuk chu titem turin chhungkua atanga bul tan a pawimawh a ti.
2. Tuiriala Aizawl khawpui bawlhhlawh paihna hmun kang chu thelh mih a nih tak avangin naktuk atangin hawn a ni ang.
3. Union Electronic and IT Minister Ashwini Vaishnaw chuan India chu khawvela 5G market lian ber dawttu a nih tawh thu a sawi.
4. Sawrkar laipui chuan thlawhna ticket man a tlawm theih nan State tinte chu Aviation Turbine Fuel (ATF) a VAT an lak ti tlem turin a hriattir.

<><><>

CM

Chief Minister Pu Lalduhoman thalai thi tam lutuk chu titem turin theihtawp chhuah a tul a, chhungkua atanga bul tan a pawimawh thu a sawi.

Vawiina Aizawla Assembly Annexe Conference Hall-a Former Legislators' Association of Mizoram (FLAM) General Body Meeting a hmanpuinaah he thu hi sawiin Chief Minister chuan a lo zir chian tawhah a tlangpuiin nula pakhat an thihin tlangval 7 thi zel ang vel a ni a ti a. Thalai leh pavalai thlan a tam hle tih sawiin hmeithai la valai tak tak, eizawna mumal nei si lo an tam a. Heng hi theihtawp chhuaha do tlan a tul tih sawiin a bul chu chhungkua ni a a hriat thu a sawi a ni.

Byte of Chief Minister....

Chief Minister chuan Mizoramah project hrang hrang laktlak loha chhuak a tam thu leh a hlui chu tih hleihtheih a nih tawh loh thu a sawi a. Project reng reng laktlak loha chhuak lo turin tun atanga tan lak a tul avangin sorkarin hmasawna hnathawh hrang hrang viltu tur Mizoram State Project Monitoring Committee a siam a ti a. Sorkar lai atang pawhin member pakhat chauh dah a nih thu leh a bak chu party leh hmun hrang hrang atangin, vawiina hun a hman pui FLAM atang ngei pawhin mi pakhat ruat tel a nih thu a sawi a ni.

Chief Minister chuan FLAM member te chu tunlai thiamna sang tawh takah tar A ni lo tura fuihin kawng hrang hrang inveng turin a fuih a. State danga damlohna thila inenkawlana an tum sak an ni thin chung a zin veivahna pek ni ngai lo chu, tunhnaiah an zin veivahna senso pek tawh tura tih a nih thu a sawi a. Circular awm mek zawm that loh, FLAM member te an zin

nikhuuaa airport leh Mizoram house inkara an thlen hlim leh an haw dawna hruai tur tih chu chak zawka kalpui a nih dawn thu a sawi bawk a ni.

Ram hruaitu, MLA leh MP lo ni tawh te intelkhawm FLAM hi kumin 1994 a din niin kumin hi a kum 30-na a ni a, tunah hian FLAM member 117 leh Associate Member 59, an vaiin member 176 an awm mek a ni.



COOPERATION MINISTER

Cooperation Minister Pu PC Vanlalruatan ram dan pui duang tu ten ram ei leh bar hmasawn nan cooperative society an ngaipawimawh a, vawiin thleng pawhin a pawimawhna a la reh lo a ti.

Vawiina Mizoram State Cooperative Union (MSCU) Golden Jubilee lawmna hun Aizawl Dawrpui venga MSCU Training Hall-a buatsaih a hmanpuinaah he thu hi sawiin Minister chuan MSCU chu cooperative society tha leh thangduang siam tura tul em em a ni a ti a, zirtirna leh inhrilhriatna pek kawnga an hnathawh chu a pawimawh a ti a. Training leh education chu society te tan thahrui a nih thu sawiin, kalphung dik zawk te, thawhho dan te leh hmasawn zel inhrilhhriat a tul thu a sawi a. Sorkar flagship programme hnuaia thlai hralh dan chungchangah pawh society te an pawimawh thu sawiin Minister chuan sorkarin society ten hma an sawn zel theihna turin a theihna chin chin a hma lak a nih tur thu a sawi a ni.

Byte of Minister PC Vanlalruata....

MSCU Golden Jubilee lawmnaa khualzahawm Registrar of Cooperative Societies Pu John LT Sanga pawhin thu sawiin United Nation chuan kum 2025 chu UN International Year of Cooperatives-ah puangin, thupuiah 'Cooperatives build a better world' tih thlan a nih thu a sawi a. Hei hian India ramah chauh nilo khawvel huapa Cooperative Society te pawimawhzia a tihchian thu a sawi a. An thupui thlan 'cooperative society hrang hrang ten khawvel chenna nuam zawk a siam' tih chuan khawtlangah ei leh bara inthlahna nasa lutuk sukiang a, hmasawn nan cooperative society a pawimawh tih a tarlan thu a sawi a ni.

MSCU hi kum 1975 March thla khan din a ni a. A din chhan leh tum ber chu Mizoram chhunga Cooperative Society te hmasawn zel theihna tura zirtirna (Education & Training) pek leh a tul dan ang zela district leh state huapa seminar leh workshop buatsaih a ni.



TUIRIAL SWMC

Nimina Aizawl khawpui bawlhhlawh paihna hmun Tuiriala Solid Waste Management Center (SWMC) kang chu thelh mih a nih tak avangin naktuk atangin hawn a ni dawn.

Aizawl Municipal Corporation hotuten Akashvani zawhna chhangin kangmei chu zing khawvar vela thelh a nih thu leh meikhu erawh a la nasat thu an sawi a. Vawiin khan thuchhuah siamin SWMC chu hawn a nih dawn thu an sawi a, hetihrial hian chhriatna thleng palh thei a nih avangin invennan AMC thawktute leh bawlhhlawh phur lirthei khalhtute leh anmahni puitute chauh luh theih a ni dawn tih an sawi a. Bawlhhlawh khawm thin te leh pawn lam mi erawh tumah luh an la phal loh thu an sawi a ni.

AMC hotute chuan bawlhhlawh tawihtheilo kara tawih thei awmin biogas a siam thu an sawi a, hei hian kangmei nasa tak a siamchhuah theih avangin mipuite chu tha taka an bawlhhlawh thliar hrang turin an ngen a ni.

<><><>

MP

Lok Sabha MP Pu Richard Vanlalmangaiha chuan nimin khan Chief of Air staff, Air Chief Marshal AP Singh chu Air Headquarters Office ah kawmin Mizo thalai te tana hamthatna awm thei te a sawipui.

Pu Richard Vanlalmangaiha chuan Air Force a Mizo thalai te tan hna awlsam zawka an dil ve theihna turin Mizoramah recruitment nei ve turin Air Chief Marshal hi a sawipui a. Air Chief Marshal hian Air Force Recruitment India ram hmun hrang hranga a neih thin chu Mizoram ah pawh neih ve ngei a nih theihna turin hma a lak tur thu a lo hrilh a ni.

Lok Sabha MP chuan Indian Air Force in Mizoram hmun hrang hranga an hmunhma neih te civil miin tangkai taka an hman ve theihna turin changtlung taka siam turin a ngen a. Chhingchhip Sainik School a Jet Fighter Display dah ve turin Air Chief Marshal hi a sawipui bawk a ni.

<><><>

CUSTOMARY LAW

Mizo Inneih, Inthen leh Rokhawmna Dan ennawntu Committee chu an Chairman, Law&Judicial Department Addl. Secretary Pu Zahmingthanga Ralte hovin Secretariat Conference Hall-ah an thukhawm a. MKHC, CYMA, MHIP, MUP, Women Commission. leh Mizoram BAR Association aiawhte bakah helam a tui mi leh mithiam bik te chu committee-ah hian an tel a ni.

He thutkhawmah hian Inthen leh a kaihnawih hrang hrang naupang enkawltu tur te, inrem leh theih dan tur te, nupui fanau chawmna chungchang leh inthen thulh a Ro insem dan tur lai te ennawn a ni.

Chairman Pu Zahmingthanga Ralte chuan Inneih, Inthen leh Rokhawm chungchangah Kum 2014-a Mizoram Legislative Assembly-in Dan a pass chauh chu hman tawh tur a ni a ti a, nupui pasal inthen tur reng rengin Mizovin Inthen Dan kawng kan neih: Mak, Sumchhuah leh a dang te la hmang tho in Court hnai berah Inthenna lehkhah lak tur a nih thusawiin, chung inthen dilnate chu Court-in thla ruk chhungin a chingfel dawn a ni a ti.

Pu Zahmingthanga Ralte chuan tunlaiah Mizo nulate, hnam dang pasal nei eng emawzat Kohhran-in a lo Inkutsuih tir te an awm a. Hengte hian Mizo Inneih Inthenna leh Rokhawmna dan, 2014 hnuaiah Inneihna an kalpui thei lova, Dan chuan a huam lo a ti a. Mizoram-a Inneihna zawng zawng chu Supreme Court thupek angin Law &Judicial Department chuan Veng tin leh Khaw tina Registrar of Marriages kal tlangin a chhin chhiah vek a, Marriage Registration Certificate a pe thin tih tarlangin he Certificate hi Sawrkar leh Ram dang Sawrkar pawhin an pawm a nih avangin fimkhur taka kal pui a tul a. Mizo hmeichhia ten ram danga harsatna an tawh palh loh nan Inneih sawngbawl leh a Dan hman tur thuah fimkhur taka ngaihtuahna hmang turin Mizo mipuite a chah a ni.

He thutkhawmah hian Member-ten siamthat ngai tia an lungrual theihna eng emawzat a awm a. he ennawn hna hi zawh fel thuai tum niin, Zawh fel a nih hunah Sawrkar-in tul a tih angin Legislative Assembly-ah Dan siamthat turin a la pu lut dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

5G

Union Electronic and IT Minister Ashwini Vaishnaw chuan India chu khawvela 5G market lian ber dawttu a nih tawh thu a sawi. Vawiina New Delhi-a IT lam kaihnnawih inhmukkhawm buatsaihah he thu hi sawiin Pu Vaishnaw chuan sawrkarin theihtawp a chhuah avangin sector hrang hrangah insiamtharna a thleng mek a ti a. Sum peipun tura dah zat pawh cheng vaibelchhe nuai 11 a tling tawh tih a sawi a. Kum 10 hmalamah kha chuan electronic thilsiam chhuahna lam ngaihthah anih thu sawiin vawiinah erawh chuan rampawna thawnnchhuah tlak khawpa tha siam chhuah a ni tawh tih a sawi a. Khawvel chhim lam ram mai nilo ram hausa zawkte pawhin sum chetvel nana India-in UPI system a hman chu hman ve an duh tawh tih a sawi a. Pu Vaishnaw chuan kumin chhung ngeiin ramchhunga siam chip zawrhchhuah hman a ni ang tih a sawi bawk.

<><><>

AIR TICKET

Sawrkar laipui chuan thlawhna ticket man a tlawm theih nan State tinte chu Aviation Turbine Fuel (ATF) a VAT an lak ti tlem turin a hriattir.Vawiin Lok Sabha inkhawmah Union Civil Aviation Minister K Rammohan Naidu chuan zawhna chhangin he thu hi a sawi a. Thlawhna ticket to chhan zaa 45 hi hi ATF-a VAT lak vang anih thu sawiin state thenkhat chuan zaa 29 te an lak thu a sawi a. VAT hi zaa 5 a tihniam state an awm laiin thenkhatah chuan ala sang hle a ti a. Thlawhna chuan man chu che reng anih thu leh mamawh dan azirin a man a sang thin tih a sawi a. Pu Naidu chuan thlawhna ticket man hi sawrkarin a bituk lo tih a sawi bawk a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 120-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>